

MEHĪ WIREMU NĀPIN HAP PAURU MIWAN

¹ Waku kahato en Wiremu. Uiwyyuat Tupana kapiat ipotpap takat kahato en Wiremu. Meiū ti areīne'en morekuat pot pyhik hawe Iesui ehay moherep hap po'ypyī. Koitywy ti atipo'oro uimiwan ewawi Wiremu. Uito ti Pauru i'ewyte aiwy Timoteu tipo'oro tehay ewawi.

² Atikuap kahato ti Iesui mohey haria aikotā te'eruwa'atunug kahato ti e'yat kape. Mi'iria kape ti i'ewyte kuekatu ui'e hap atipo'oro. I'ewyte uhekuekatu atipo'oro uheinyt Apia pe i'ewyte aiwy ok Akipu e hap het rakat kape ai'ewyyuat Iesui esurara yt naku i moma hamuat rakat kape.

³ Koitywy ahētup kahato Ai'ywot Tupana kape i'ewyte Aipotypot Iesui kape — Etum ne'en ne'i o Wiremu'in me egyi'at hap i'ewyte eti'atumowepit mi'iria are Tupana pe.

⁴ Ta'i uhehay kahato ti Tupana kape mesuwe epowyro hamuat ahētup kahato uiwy Wiremu. Mi'i atunug neran ne. Arehum kahato Tupana kape eupi are.

⁵ Koitywy ti ehay put'ok'e ra'yn uhete aikotā ikahu kahato ereīne'en hap ete aikotā Tupana emiit'in ky'e kahato hat en Aipotypot Iesui mohey hat sese ra'yn erepyhu'at hap. Mi'i hap atikuap ta'yn mesuwe hawyi uimowepit kahato.

⁶ — Tupana atiky'esat kahato Wiremu'in wētup ehay yn Iesui mohey haria te'eropyhu'at are Tupana kape. Atiky'esat kahato Wiremu'in wētup

piit ewy yn tukupte'en hamuat. Tupana urupo-
wyro kahato En po'og po'og eminug ikahu kahato
rakat kuap hamo Esa'yru Urupotypot Iesui emi-
wan ne'en ne'i i'ewywuwat haria pe urunug Tupana
are.

⁷ Uiwy Wiremu en uruky'e hap i'ewynte uiky'e
hap po'og uimowepit kahato hap topyhu'at. Uimo-
wepit kahato meiūpe arewanētup ewawiat hawyi
are. Yt uito yn i ma'ato yne Tupana emiit'in
mowepit kahato hat en.

⁸ Pyno ahētup teran epe uimiky'esat iwato'in
nakat Wiremu ma'ato eyke'et ewy ahētup perup'i
puo epe Iesui mohey haria aito pote. Yt ati'akit
teran i uiky'e epiat hap uimiētup mo. Yt woromo-
py'ahak teran i egyi'at hap ete. Mi'i pote etunug o
epy'a pyi uiky'e hap wywo uimiētup hap atiky'esat.

⁹ Uito ti meiū Iesui mohey haria apykok han-
uaria akag wuat Tupana mi'airo kahato. Mi'i
pytkai yt woropo'oro i haty wo ma'ato perup'i
puo yn ahētup epe uimiky'esat eky'e popuo Iesui
po'ypywiat uipyhik pyi ahētup epe perup'i puo.

¹⁰ Areñe'en meiūpiat wo'opyhik hawiat turan ni
put'ok'e uhete sa'awy'iwuat emiit emiky'i'at wuat'i
miit'in eropat re'en ne'i hat Unesimu e hap e'atoiat
hat put'ok'e uhete. Mi'i hawyi ti ahenoī tope
Aipotypot Iesui etiat mi'i hawyi ti totomohey ra'yn
Iesui uhehay upi. Mio koitywy topyhu'at uha'yru
ewy ra'yn pāi meiūpe are. Mio Iesui mohey hano
ra'yn topyhu'at. Mi'i pote i'ywot ewy areñe'en
katupono uimienoi kaipyi ra'yn tuwemoherep
pakup i.

¹¹ Atikuap ti sa'awy'i ti emiit no te'en ne'i
yt tuwe'eg hin i rakat Unesimu toñe'en ma'ato

koitywy wakuat semiit no i ra'yn topyhu'at. Uipowyro kahato hat wo ra'yn ti mio topyhu'at. Ahemiit pakup mo ra'yn ni toĩne'en.

¹² Pyno koitywy atiporera'aipok i ra'yn ewawi ma'ato uiwak popuo atipo'oro ewawi katupono atiky'e kahato Unesimu.

¹³ Yt atipo'oro teran hin i wen ma'ato atiky'esat kahato uipo pe topyhu'at katupono waku kahato uheropat uipyhik hawiat turan Iesui po'ypywiat uipyhik turan. En yt uwe i meiũpe pote uheropat emiit Unesimu.

¹⁴ Ma'ato atiky'esat emiky'esat yn atunug mehĩ. Yt kat i uhewiat epo'oro haty wo hap mywo ahẽtup. Waku topyhu'at uipowyro hano meiũpe wen ma'ato e'e hap yn atiky'esat.

¹⁵ Atikuap aikotã sa'awy'i Unesimu e'atoiat rakano toĩne'en. Yt iwe'eg hin i turan topopy e'yatypepyi ma'ato mesup atiporera'aipok ewawi emiit pakup mo ra'yn. Unesimu ta'aipok ta'yn Tupana piat toto mopakup i hamo uiwanẽtup hawe are arewanẽtup. Mi'i hawyi wuat'i e'at piat emiit nuat ra'yn topyhu'at Unesimu.

¹⁶ Sa'awy'i te ti ewat emiit sese toĩne'en ma'ato mio wyti po'og na'yn emiit no topyhu'at sa'awy-iwuat kai. Aikotã eywyt ewy sese ra'yn topyhu'at katupono Aika'iwat mohey hap kaipyi ra'yn aheywyt no Tupana tunug. Uimiky'e kahato mi'i kulum Unesimu. Meiũran ti aru po'og sa'awy-iwuat emiit nuat hap kai topyhu'at katupono koitywy eywyt no ra'yn topyhu'at Iesui mohey hap kaipyi ra'yn.

¹⁷ Wiremu uiky'e apo en. Ta'i atikuap uiky'e hap. Uhekatuwy apo en. Hẽ ere pote waku —

Ereke ro ere kurum Unesimu pe are aikotā — Ereke ro ere uhepe hap ewy o ere o mi'i pe. Pyno etiky'e ro aru Unesimu uiky'e hap ewy mehī are.

¹⁸ Toīne'en ema'at hap Unesimu minug mote waure wo ereīne'en mi'i hap ete ema'at hap kai. Toī epiat iweteweru hap pote uito aha'up nug iweteweru hap ok tā aha'up nug yne iweteweru hap are.

¹⁹ Pyno ti uipo wo atunug uimiwan mesuwe uimipo'oro ewawiat Unesimu weteweru hap aha'up nug yne ui'e hap. Uito ti Pauru uipo wo atiwan mesuwe uhet — Atum Unesimu weteweru hap etiano Wiremu kape are. Uipo wo atopytyk uimiwan nuat mesuwe Pauru. Yt etiwaure tei'o ma'ato uhepiat eweteweru iwato hap katupono sa'awy'i uiwē kaipyi etikuap mesuwat wuat'i e'at piat ieīne'en hap uhehay pyi mehī. Mi'i tupono iwato kahato eweteweru hap te yt kat sa'up i etum pytkai.

²⁰ Mi'i tupono ahētup ewawi uipy'a pyi etunug no Aika'iwat Iesui mōtypot hamuat. Uipowyro o mesuwat uimiētup ete. Mi'i etunug mote uimowepit kahato katupono eheyke'et sese areīne'en uito. Uheywyt en Aika'iwat Iesui mohey hap kaipyi.

²¹ Pyno woromohey kahato en Wiremu. Ta'i arewanētup turan ti etunug aru mesuwat uimiētup ewy uimiwan miat ewy. Arewanētup etunug po'og aru uimiētup kai uiky'e epiat pote.

²² Uiwy Wiremu pyno etunug kahu o e'okipy uiwat i te uheiam mo itote katupono areto irane ewawi ma'ato mesup yt areto kuap i te. Atikuap ta'yn aikotā eweiky'esat kahato uhewyry

ehowawiat hap. Atikuap aikotã eiwehêtup uhepiat ut hap Tupana kapiat — Etum o Pauru pe mu'ap kahu uruwawiat Tupana ei'e hap atikuap. Atiky'esat kahato Tupana tum eimiêtup ewy are.

²³ I'ewyte ti toĩne'en meiũpe mipyhih aiwy Epawai e hap Iesui po'ypywiat mipyhih. Epawai tuwekuekatu ipo'oro ewawi.

²⁴ I'ewyte ahekatuwu Tupana potpap nug hat Maku tipo'oro teran ewawi kuekatu e hap. MehĪ Aritaku i'ewyte ewy uhyt Tema i'ewyte ewy Iruka i'ewyte kuekatu ehowawi ipo'oro. Mi'iria meiũpe uipowyro kahato Tupana motpap nug hap ete.

²⁵ Mio tã are ahêtup Aika'iwat Iesui pe — Ereĩne'en no aiwy Wiremu'in powyro kahato hamo are. Etum ne'en ne'i ro egyi'at hap ok tã i'atuepe are Aipotypot pe. Mesup toran na'yn uimiwan ewawiat uiwy Wiremu.

Uito ti PAURU

Tupana Ehay Satere Mawe Pusupuo
New Testament in Sateré-Mawé (BR:mav:Sateré-Mawé)

copyright © 2011 Wycliffe Bible Translators, Inc.

Language: Sateré-Mawé

Translation by: Wycliffe Bible Translators, Inc.

Sateré-Mawé [mav], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Sateré-Mawé

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

86691f85-c501-5f1f-949e-903f2bbf9ae7